

I'uleo O le MALUAPAPA



Tala mai le Kolisi Faa-Faifeau i Malua / News from Malua Theological College; Lomiga XXIV - Novema 2010
www.malua.edu.ws

LOMIGA FAAPITOA MO OTELE MA JULIE

TALOFA LAVA!

I le suafa paia o lo tatou Alii o Iesu Keriso, ou te faatalofa atu ai i le mamalu o le au faitau uma o lenei lomiga o le Maluapapa. Malo le soifua maua ma le lagi e mama. Ou te faatalofa atu foi i le paia ma le mamalu o le aofia ua potopoto mai e molimauina le Faamanuia a le Kolisi i lenei tausaga 2010. Lau afioga i le Taitaifono o le EFKS faapea le Laulau o le Fono Tele, i le Sui Taitaifono, le Failautusi ma le Teutupe. Lau afioga i le Taitaifono o le Komiti a le Au Toeaina ma le Failautusi faapea le Komiti a le Au Toeaina, o Komiti taitasi a le Ekalesia, faapea le paia i Faafegaiga ma le aoao o le Ekalesia i ona tulaga faalupu. E faatalofa atu foi i le paia o sui o Ekalesia ma sui o le Malo ua mafai ona auai mai i lenei aso faapea le mamalu o Samoa ua potopoto mai, ae maise o matua ma aiga, o uo ma aumeamamae a lenei Kolisi. Ia saga faateleina pea le viiga ma le faafetai i le Atua, ona o lana pule faasoifua ma lona agalelei tele ua tatou aulia mai ai le taunuuga manuia o galuega a le Kolisi Faafaifeau i Malua i lenei tausaga 2010. E talitonu lava le taofi, o le tatalo faifaiepa a le Ekalesia faapea nuu ma aiga, ua manuia ai ma sologa lelei fuafuaga uma a le Kolisi i lenei tausaga.

E tulaga ese lenei lomiga o le Maluapapa. O le masina lenei o Novema 2010 ua faamavae aloaia atu ai lenei Kolisi ma le Ekalesia i le Susuga i le Alii Polofesa o Otele Perelini ma lona Faletua o Julie faapea nai o la alo o Fiona ma Emily ma Olivia. E talitonu le manatu ua alagata ma talafeagai lelei lo tatou patipatia o le soifua galulue o Otele ma Julie i nei tausaga e tele sa auaina ai i le Atua e ala i le Kolisi Faafaifeau a le Ekalesia i Malua. O 'auga o aute la o le lomiga lenei o le Maluapapa, o saafiaiga ma alofaaga faapea upu taumavae ma faamanuiaga e le gata mo le Susuga ia Otele ma le faletua ia Julie ma si a la fanau, ae faapea foi mo



Susuga Dr Afereti Uili FS
Pule o le Kolisi

A'oa'o uma ma Faletua ua faai'uina manuia le taumafai i totonu o le Kolisi i lenei tausaga 2010.

Avea la lenei avanoa e fai ai a'u ma sui o le Kolisi Faafaifeau i Malua, le Sui Pule ma le Aiga Faiaoga ma Faletua, tulaga tofi ma le nofo a suega i A'oa'o ma Faletua faapea alo ma fanau a lenei nuu, e momoli atu ai le faamalo ma le faafetai tele i lau Susuga Polofesa Otele Perelini ma le Faletua ia Julie ma le fanau, e tusa ma le galuega mae'ae'a ma le matagofie lea ua molimauina e le Ekalesia i tausaga sa auaina ai i le Ekalesia e ala i le Kolisi ae maise lava o tausaga na aveai ai ma Pule o le Kolisi i Malua. O le upu e fai i le faiva i le gataifale, "Ua sili ofe le tautai o le igafo ua faatamasoalii lana atu, Tautai A'e!" Malo le tauata'i ma le faatoatoa i le galuega sa fitaituga i ai i fatia ua alu ma aso ua mavae. Lele ua a'e malo oulva faiva, malo fai o le faiva! Faafetai i la oulva faasoa i meaalofo

faaleagaga ma taleni ua ia te oulva, o lea ua mafatotoga ai le aufaigaluega galulue ma le aufaigaluega a'otauina i le faasoa faata'ita'i ma le faamatua, ae maise o le faasoa faale Atua mai ia te oulva. O le tatalo a le Kolisi, ia faatumu pea e le Atua le utu ma ia faafualoa le soifua, ia saga faatamaoigaina oulva i ana meaalofo atoatoa uma aua nisi laasaga o le soifua auaina i le Atua i le lumana'i. E le mafai ona faagaloina le mafutaga mafanafana i tausaga e tele sa tatou galulue ma mafuta ai i Malua nei, o le a tuliloaina pea foi oulva ma le fanau i la matou tatolo.

Le su'ega faaiuso o le 2010, a outou Susuga i A'oa'o ma Faletua, malo le tauivi ma le onosa'i. Lea ua tini pao le uto e pei o le faiva i vai, malo le faatoatoa faafetai le galulue punoua'i. Sa tapua'i aiga ma le Ekalesia a'o outou alo faiva, ia viia le Atua aua o lea ua faaiuina ma le manuia le taumafai. Faafetai i auala uma ua agalelei mai ai i le Kolisi ma e le mafai ona faagaloina le mafutaga. Alofagia e le Atua lo outou taliu atu i aiga ma nuu ma le Ekalesia, ia saga tapenaina pea outou i meaalofo mai le Atua aua lana galuega ua ofoina iai lo outou soifua.

Avea foi lenei avanoa e momoli atu ai faamanuiaga mo a outou Susuga i Faiaoga o le a tuua le Kolisi mo le toe faalateleina i mataupu silisili ma suesuega i le Tusi Paia aua le Ekalesia ma lana Kolisi Faafaifeau i le lumanai. Lau susuga Arthur Wulf ma le faletua ia Sina, lau susuga Latu Latai ma le faletua ia Lotu, ma lau susuga Vaitusi ma le faletua ia Mile ma outou fanau. Tatalo ia alofa le Atua ma faamanuia i le taumafai ma ia leoleoina lo outou soifua i aso uma o le a toesea ai mai le Kolisi.

Tau ia ina ia tofi maua e i tatou uma se Kerisimasi fiafia ma se tausaga fou manuia mai le Atua.

Soifua,
Afereti Uili.

SILASILA I TOTONU

Talofa Lava! - Afereti Uili	1	Malua Kindy	11
Faamalo Fai o le Faiva	2-3	Aoga Aso Sa	11
Alofaaga mai vasega taitasi	4-6	Taaloga / Alofaaga mai le Kolisi Leulumoega Fou	12
Faamavae le Kolisi ia Otele ma Julie	7	Autalavou Laiti / Vaega o le Pa Povi	13
Meaalofo Whitley College	7	Laugatogi Malua 2010	14
Nisi o vaaiga i le soifuaaga o Otele ma Julie	8-10	IA MOTU LE PA A UA ILOA	15
Mafutaga Aoao ma Faletua	10	Faamalo fai o le faiva	16

POLOFESA OTELE PERELINI MA LE FALETUA JULIE FAAMALO FAI O LE FAIVA

I le fa'aiuga o se galuega tele sa fai ma ua lelei, ma ua matagofie, e onomea lava ona momoli atu ai le fa'afetai ma le fa'amalo.

Lau Susuga Polofesa Otele Perelini ma le Faletua Julie, fa'amalō fai o le faiva. Sa oulua galulue i tausaga e tele i le a'oa'oina o le poto o le fanau laiti, fa'apea le atamai fa'ale Atua mo a'oa'o ma faletua. O le tauaveina o le tofiga o le Pule o le Kolisi Fa'afaifeau a le Ekalesia Fa'apotopotoga Kerisiano Samoa i Malua; o le galuega fa'afaifeau i le fa'afaileleina o le soifua fa'aleagaga o le aulotu i le laumua, o le fai ma sui o le Ekalesia ma le Pasefika i fono ma Komiti i fafo fa'apea le lotoifale o le galuega a le EFKS, faamalō fai o le faiva.

Sa oulua fa'afale lē malu i Maluapapa ma utuvai i le finagalo o le Atua mo fa'amanuiaga e fa'ataumafa ma fa'ainu ai le Ekalesia ma le aufaigaluega, faamalalo fai o le faiva.

Ua oulua faati'eti'e le Ekalesia i le ma'a sālafa ona o galuega lelei, o sao tāua, fautuaga aogā, aga fa'atamā/fa'atinā ma meaalo fa'ata'ita'i, ua sasa'a uma mai le utu a le faimea, faamalō fai o le faiva.

E tele fitā o le galuega sālū'itauina ai le soifua auauna. E ui fo'i ini tomai



**Susuga ia Ioritana Laau Tanielu (FT)
Taitaifono o le Komiti o Malua, Taitaifono
o le Komiti a le Au Toeaina**

ma ni agava'a, ae fa'afaigofie ona tete'e le uluga ma fa'ama'amulu. Peita'i sa mau pea le to'ovae i le tofā fa'ale Atua. Ā lea ua malie le maimoaga i le Laulala, le atu sa tuli aupū, lea ua taumasuasua le ipu a le Ekalesia ma alo ma fanau. Fa'amalō fai o le faiva, auā o lea ua a'e malō le sāliliga a le tautai matapalapala na tofofi ma valaau e le Atua mo ana

feau. Fetalai lo tatou Alii o Iesu: "Pe a uma ona fai o mea uma na poloa'iina atu iā te outou, tou te fai ane, O auauna le aogā i matou nei."

Faafetai, auā e leai ni mala mata'utia, ua tafea i le To'elau ao o le lagi, ona o le alofa o le Atua Silisili Ese na fa'atautaia le soifua galulue. E ui ina malōlō, e toina fo'i galuega ma toe afua taeao. E ui ina fesuia'i laau o le Fa'atoaga, e i ai pea ē galulue i le tovine, auā o le aso ma le filiga, o le aso fo'i ma le mataigā tila.

O le fesuia'iga o tofiga o tautai o le faiva ma le to'otaumua, tatou te fa'alagolago i le Atua, e na te ta'ita'i le fa'aauauna o le galuega a Dr Afereti Uili ma Samata faapea le Kolisi. Fai ia lo'u auauna fa'atauva'a e fofogaina atu ai le fa'afetai tele ma le faamalō fai o le faiva, e fai ma sui o le Ekalesia e pele pea ia te oulua Otele ma Julie, le laulau o le Fono Tele a le EFKS fa'apea le Komiti a le Au Toeaina ma le Komiti a Malua, e molimoli atu ai la matou fa'amanuia mo oulua Otele ma Julie fa'apea le fanau pele Fiona, Emily, Olivia.

Alofaaga ma Fa'amanuiaga i le tatalo i le Atua.

O Laau I. Tanielu

Ta'ita'ifono Komiti Au Toeaina.

MO POLOFESA OTELE PERELINI



Maafala Lima - Suipule o le Kolisi

Ua faamalalo galue, ua faafetai onosa'i. O le tele o nei tausaga sa galue punouai ai i le galuega faafaiaoga i le Kolisi Faafaifeau i Malua, e te le'i faafiti pe sa'i. Sefulu lima foi tausagao avea ma Pule, sa e tu matilatila lava i le faatinoina o le tofi. Ao ia tausaga e tele, o le molimau ola lea o lou faatuatua i le Atua ma lou gauai i lou valaauina.

E le gafatia e se upu ona autala au galuega ma lou sao; ao loo silasila mai le Atua e ana le galuega. Ae tau ia ona matou faapea ane: "Tautai ae." Ua faamalalo fai o le faiva. Mapu laia i falamatu ma tatalo mai mo le Kolisi.

Ao se avanoa foi lenei matou te faamanuia atu ai ia Rev. Dr. Afereti Uili ma le Faletua ia Samata ua tauaveina le galuega: O oulua mamā na.

Tatalo i le Atua ina ia maua e oulua ma Julie ma le nofo-a-alo se Kerisimasi Fiafia ma se Tausaga Fou manuia.

Soifua

Ma'afala Limā (F.F.A)

Sui Pule (2009-)

Kolisi Faafaifeau i Malua

MAFUTAGA A TINA

Faafetai ma faamalo i le Mafutaga a Tina mo Tiute ma galuega faatino o lenei foi tausaga 2010. E le faigofie le soifua a'o-tauina i totonu o le aai nei, ae o lona itu taua, o le tapenaina ai o le ola onosai ma le ola tauivi o le tagata i itu uma o lona soifuaga a'o'a'ina. Faamalo!

O le tausaga lenei ua matou faamavae atu ai i le faletua ia Julie Perelini, o le sa avea ma o matou taitai i le mafutaga a tina mo ni tausaga se tele.

Matou te avea ai lenei avanoa taua e momoli atu ai la matou faafetai tele i le tina ia Julie Perelini, e tusa ai ma lona sao tele i le mafutaga a tina o Malua i tausaga e tele ua mavae. Tele le tamaoaiga ma le sosia ua matou aea'eina ona o taleni faapitoa ma agavaa a le faletua sa sasa'aina mai mo i matou. O le fa'ataua ma le fa'amamafa a le faletua ia Julie, o le itu tau a'o'a'oga o tina ma fanau.

O le Aoga Faataitai ma le Aoga Faitau Tusi, o galuega gagana ia a le faletua ia Julie ua molimauina ai le tele o lona sao taua i tina ma fanau a lenei kolisi. O fua o ana galuega, ua molimauina lea i le fa'amanuaina o tulaga tau i a'o'a'oga a fanau a le Kolisi. Faafetai tele Julie mo au galuega lelei ma le taua ua e faasoa mai mo tina o Malua aemaise ai fanau.

E le ititi foi sa matou faafetai mo le Tama ia Otele o lona foi sao taua i le mafutaga a tina. O le tapu'eina o le ola fa'aleagaga faapea le fa'aletino sa mausali ai ma tutumau le ola faatuatua ma le ola tauivi o tina o Malua. Malo le fa'atoatoa ma le faapalepale ia te oe le Tama.

O matou moomooga alofa mo oulua, ina ia maua pea e oulua le soifua malosi ma le maloloina i le tino, mafaufau ma le agaga, e faaogaina ai pea o oulua soifua i ni tiute ma ni faiva o totoe. Matou te

faamanuia tele atu foi le Kerisimasi ma le Tasaga Fou mo oulua mai le Mafutaga a Tina o le Kolisi Faafaifeau a Malua.

*Le Tautai o le Namo e avatu o le faamalo
Ua ae ou faiva ua ae ma le manumalo
Mapu ane laia i le paolo sei malolo
Ae sei ou saasaa atu mo oe le uo
Moomooga lilo o le loto nei ma le mafaufau
Si a ta mafutaga pe le toe faaauau
A ua seese lava lou sa ua e folau
Manumanu i le manu sa tuli ua le taulau*
CHORUS

*Faafetai Perelini i le sao ma le taitaiga
Faamalo o le taupati ma le fai o le faiva
O lou sao taua ou te le tau faailoina
Au galuega ia ou te le toe faanapeina*

*Malua e sei alofa aua lava nei faagaloina
Le tele o suiga sa ia faia i lana taitaiga
Ua siitia tulaga maua luga o le aoaoina*

fa'aauau itulau 10

SAAFIAFIGA MO OTELE MA JULIE PERELINI



Rev Dr Featunai Liuaana

Lo'u agaga e, ia e faamanu atu i le Alii, o mea uma foi o i totonu ia te au ia faamanu i lona suafa paia. Lo'u agaga e, ia e faamanu atu i le Alii, aua foi ne'i galo se mea e tasi o ana mea alofa... (Salamo 103: 1-2)

Ou te le mautinoa poo fea tonu lava e ao ona amata ai lenei molimau mo le Susuga i le Alii Polofesa ia Otele Sili Perelini ma le faletua ia Julie Perelini. O i laua oni auauna na ofoina atu ma le faamaoni o la soifua e auauna atu mo le manuia o la atunuu, ekalesia, aiga, faapea foi le toatele o la uo i le talalelei. E tele ni tausaga na matou mafuta ai ma le Susuga ia Otele ma Julie i totonu o le Laumua o Malua. I le tausaga e 1985, sa avea ai au ma lo'u to'alua ia Perise e fai ma aoao ma faletua o le Kolisi o Malua. O le tausaga e 1998, sa valaauina ai i ma'ua e

galulue i le galuega faa-faiaoga. A'o le tausaga e 2007 i le masina o Mati seia oo atu i le tausaga e 2009 i le masina o Aukuso, sa ou maua ai foi le avanoa e galue soosoo tauau ai ma le Susuga ia Perelini i le tulaga o le Sui-Pule a le Kolisi. O lona uiga, e umi lava se taimi sa matou mafuta faatasi ai ma Otele ma Julie, e le gata i le taimi sa ma aooga ai i totonu o le Kolisi, ae faapea foi le tele o tausaga sa galulue feoeoeai ai i le aoaoina o alo ma fanau a le Ekalesia i totonu o le Laumua. Ma o le ala foi lea ua ma lagona ai le agaga fiafia ma le faafetai ona o le sao taua a le Susuga ia Otele ma Julie i totonu o le Kolisi e ala i le la taitaiga lelei, faapea foi le maoae o le tulaga tau aoaoina o aoao. E le gata i lea, ae ua lagona foi le loto fiafia ma le faafetai ona o le mafanafana o le mafutaga faa-le-uo. I le avea ai ma Pule o le Kolisi i tausaga e sefulu ma le lima, e tele uiga ma aga o le susuga ia Otele sa matauina. Peitai e o faatasi lava ma le agaga naunau atoa ma le loto faatuatua i le Atua o Le e ona le galuega ua valaauina ai, mo le faaleleia ma le siitia o le tulaga o le Kolisi o Malua i se tulaga maua luga e pei o isi Aoga maua luga o le lalolagi. Fai mai le Alii o Orson Swett Marden, "e le fuaina le manuia i se mea ua faatinoina, ae fua i le tele o luitau e feagai ai atoa ma le loto-tele e tauivi ai ma faigata ma suiga e tutupu."

Mo le uso-a-auna, a'o se uo pele, Otele ma Julie, e le faigofie o oulua faiva, aemaise o le naunautaiga ina ia tulaga manuia le Kolisi e ui i le tele o faafitauli. Ua tulaga ese la oulua sao, ma ua tala fetauti ai le faaeaea i lau susuga ona o lo

oulua onosai ma le faapalepale, ae maise o lo oulua soifua faatuatua i le Atua, o le na faatupu malosi i lo oulua soifua auauna. O le mea mautinoa, e manatua pea oulua Otele ma Julie e tagata o le EFKS nei, faapea auga tupulaga o le EFKS i le lumanai, ia oulua galuega lelei uma lava sa faatinoina.

Fai mai le Alii o Albert Schweitzer, "Ou te le iloa tua atu o lou faasinomaga, ae tasi le mea ua ou iloa: o tagata e sili ona fiafia o i latou e sailiili ma iloa le uiga o le auauna atu." Ose fiafiaga sili le aoaoina ma galulue i lalo ifo o la oulua taitaiga, ae maise o faataitaga lelei mo i matou e ala i le lua auaunaga i le Atua ma lana Ekalesia, faapea foi ona tagata faatuatua.

O le ma tatalo ma Perise, ia manuia lava la oulua malologa. Ia maua e lau Susuga Otele ma le faletua ia Julie le fiafia ma le olioli, ae maise foi le malosi mai le Atua e toe faaogaina ai lo oulua soifua, o taleni ma agavaa o loo i ai, ina ia faateleina ai pea lona lava viiga. Fai mai le filosofia a se tasi o tagata tautaua e suafa ia Voltaire: "O le tau pito sili ona lelei mo se galuega ua taunuu manuia, o le iloa ua faataunuuina ma ua maea." A o la le aposetolo o Paulo, "Ua ou tau le taua lelei. Ua iu ia te au le tausinioga, ua ou taofi i le faatuatua."

Ia manuia tele faamoemoega uma mo le lumanai...

Rev. Dr. Featunai ma Perise Liuaana
EFKS Sandringham

AL OFA A G A M A I V A S E G A T A I T A S I

1 9 9 5 - 2 0 1 0

1995

Matou te momoli le faafetai i le Atua i le sao taua o Otele ma Julie e le gata i le Kolisi i Malua ae faapea foi le EFKS. O le tausaga 1995 na avea ai Otele ma Julie ma Pule o le Kolisi i Malua, ao avea lenei vasega ma faaiuso i le tausaga tonu lea. E le fou i ai matou le tulai mai o Otele e fai ma Pule, aua sa tele foi tausaga o avea o ia ma Sui-Pule o le Kolisi. E tele se oa faaleagaga na matou maua mai i lenei auauna iloga a le ekalesia. O la matou tatalo ia saga faamanuia le Atua i laasaga uma o lo oulua soifua auauna i le Atua. Alofaaga Faaiuso 1995

1996

E manatua pea oulua Otele ma Julie i loto ma agaga. O Otele o se taitai e tumu i le alofa. E iloa lava lea i le inaina o le toeaina i le tele o taimi i le tau faasa'osa'oina o mea e le talafeagai i lana silasila. E faagalogata foi aua o Otele o se tasi e fiafia tele e atiae le Kolisi faafaifeau ina ia solo lelei pea i le lumanai. Ua toatele le auuso i lenei vasega ua galulue i afioaga eseese, aemaise o vaega eseese i le feau ma galuega a le Ekalesia. Alofa le Atua ma faamanuia i lau susuga Otele ma Julie. Ia saga faaagaina pea e le Atua lo oulua soifua mo ana feau ma galuega i le lumanai. Soifua.

1997

E momoli tele atu le faafetai ma le faamalo a lenei vasega i le Susuga Polofesa Otele Perelini ma le faletua ia Julie. Faafetai tele i le sao taua a o feagai ai lenei vasega ma le ola aotauina. E le gata i le tamaoaiga faasoia mai i le mafaufau, a ua faapena foi i le ola faaleagaga. Faafetai Julie i lou alofa i nai a matou fanau, aemaise le faitauga tusi ua atamamai ma popoto ai. Faamagalo mai so matou vaivai i la tatou mafutaga ma ia faamanuia tele le Atua i lo oulua soifua auauna mo le Atua ma lona finagalo i le lumana'i. Alofaaga Faaiuso 1997.

1999

O se taimi faanoanoa lenei ina ua maua tala ua faamavae le Susuga ia Otele ma Julie mai le tulaga Pule i le Kolisi i Malua. E tele foi ni suiga lelei na faia e le Susuga ia Otele i o matou aso. O le taumafai o Otele mo le polokalame o le tikeri (degree programme) sa avea ai la matou vasega ma uluai vasega na faauuina mo lea tikeri. Matou te ofo alofa atu ai Otele ma Julie. Faafetai, faafetai tele mo lo oulua sao taua i lenei vasega. Ia utu pupuina e le Atua lau utu ma ia faatasi le Atua ia te oulua i soo se ala o lo oulua soifua auauna i le Atua ma lana talalelei. Alofaaga Faaiuso 1999.

2000

Ua faamalo fai o le faiva, o lea ua a'e ma le manumalo le tautua ma le auaunaga sa oulua feagai ai i le Kolisi Faafaifeau. E le galo oulua ma le tina ia Julie a o tatou mafuta faatasi mai le tausaga e 1997-2000 i totonu o le aai i Malua. Faafetai mo le taitaiga faa-matua alofa moni na faafoeina ma tapu'e ai lo matou ola taumafai mo le Atua ma lana galuega aemaise lo oulua agalelei ia matou fanau. Faafetai faapitoa i lau susuga Otele i lou sao i lo matou ola aoaoina faa-faifeau mo le galuega aemaise le faamalosi a'u i faafitauli o le a fetaia'i pe a valaauina e auauna mo le Alii. Matou te talitonu o lou naunau ina ia lava ta-oso i matou i le galuega na le natia ai lava se mea e tasi o meaalofo a le Atua na tuuina ia te oe a ua faasoia uma mai i ai matou ina ia lelei ma atoatoa la matou auaunaga mo le Atua ma lona finagalo. O la Saulo ia Tavita ".....e te faia e oe mea e sili, ma e malo pea lava...." Ia faamanuia tele le Atua i lau susuga ma le faletua ma le fanau aemaise le laasaga fou o le soifuaga ua ausia.

2001

Faafetai i le Atua mo Otele ma Julie ona o lo la sao mo le EFKS aemaise le Kolisi Faafaifeau i Malua, o Aoa ma Faletua ma o latou aiga. O oulua o ni auauna alofa ma le agalelei. Ia faamanuia le Atua ia te oulua ma le fanau. Ia manuia le feagai ai ma malologa. Ole a misia oulua pe a o atu i Malua. God Bless.

2002

E le mafai lava ona faagaloina le susuga ia Otele Perelini i loto o lenei vasega i le mafutaga i na tausaga e fa (1999-2002). O se mafutaga na amata leaga ona e iai nisi o le auuso na toatamai ai le alii pule i lona vaitaimi ina ua le o mai e vaai le toeaina e faasino atu ni fale e nonofo ai pe a ae mai, ae na tutuli mai iai a latou faifeau ma o latou matua. Le mafuaaga lona na aami ai lava e Otele nisi o le auuso o lenei vasega i le aso muamua faatoa ae ai le aoga ma lau e le toeaina le fia fai tavini; ma ua avea lona mea ua matou aoaoina ai ma iloa ai le tele o mea e tatau ona faateete iai aua e toatamai ai le susuga ia Otele. Ua matou talitonu ai foi, o le toeaina e inaina tele, ae o lona naunautaiga lona ina ia lelei mea uma ma amio lelei tagata uma. Ina ua uma ane tausaga e fa, ua tele mea lelei faapea foi tu ma aga e tatau ona savavali ai aoa ma o latou faletua aemaise foi o a matou fanau. O le mea la lea e momoli atu ai le faafetai tele ma la matou faamalo i le susuga ia Otele Perelini ma le faletua ia Julie ona o mea aoga e tele ua mafai ona aoaoina mai ai. O le mea mautinoa, e le mafai ona galo oulua i o matou tagata. O o matou moomooga ma saafiafiaga, ia faafualoa pea e le Atua lo oulua soifua ma faaogaina pea e le Atua oulua i le tele o isi auaunaga e viia ai pea lona suafa. Ia manuia tele laasaga uma o le soifuaga o totoe mo oulua ma le nofoaalo, ma e manatua pea outou uma e le vasega o le '99-2002. Ia manuia le Kirisimasi ma le tausaga fou.

2003

E ulufale mai lenei vasega i le 2000, ua ono tausaga talu ona avea le Susuga ia Otele Perelini ma Pule o le Kolisi. E mafai

la ona faapea, o le suiga nei o le vasega o le 'Meleniuma Fou.' O se tulaga na faafiafiaina ai lenei vasega, o le fa'aaogaina o matou sui e fesoasoani i le atina'eina o galuega eseese i totonu o le Kolisi. Aua e i ai sui o lenei vasega e agavaa i le kamuta, o tusi ata (architect), o inisinia, o faipese, ma faafiafiaga tau siva.

E ui lava ina le soona tofia e Otele tagata e faatino galuega faapitoa, seiloga ua ia mautinoa e mafai ona faatino le galuega i se tulaga lelei ma mae'ae'a. Ae peitai sa tuuina mai e Otele lona faatuatuaga ona o lona naunautaiga ia gasolo lelei polokalame, ma moomooga mo le alualu i luma o tulaga o fale ma atina'e eseese a le Kolisi. Sa matauina le tele o suiga i totonu o le Kolisi ina ua matou i'u i le 2003, i le tele o fale na toe faafouina (renovate), o nofoa na fausia i luma o le canteen, le ofisa fou o faiaoga, umukuka a le dining room ma isi lava galuega aoga.

E momoli le faafetai tele ma le faamalo i lau Susuga Otele ma le faletua ia Julie mo le tele o galuega lelei ua oulua faia, aua le agai i luma o le laumua o le Ekalesia. Faafetai mo le tomai sa faasoa mai mo lenei vasega i soo se auala. O moomooga o lenei vasega atoa ina ia manuia tele le lumanai i nisi feau o le a fa'aaogaina ai o oulua soifua e le Atua.

2004

E manatua pea le susuga ia Prof. Otele Perelini ma le faletua ia Julie i lagona ma manatu o lenei vasega. E le gata o ia o se taitai lelei, ae sili ona faagalagata ona o lona tulaga faatama i la matou mafutaga. O se mafutaga sa sologa lelei i le tele o taimi, a e i ai foi taimi e sou ai le vasa, aemaise lava pe afai ua le faamaoni se faatinoga. Faafetai tele Otele ma Julie mo le fa tausaga ma lo oulua sao i le faafaileleina o sui taitoatasi o lenei vasega aua le tautuaina o le Atua ma lana talalelei. Ua tele lo oulua sao ma mea taua ua mafai ai ona ae malo le faiva ma le tausinioga sa feagai ai i totonu o le laumua. Matou te tatalo ia saga faamanuia tele le Atua i lo oulua soifua aemaise o le lumanai i soo se feau ma se galuega.

2005

E faailo le Agaga faafetai o lenei tausaga i le Susuga ia Prof. Otele Sili Perelini, o le sa tu i le foe, ao aotauina i le fa tausaga. O se taitai mataala, a o se taitai foi e faafefe tagata. O le taimi ua ata, o le taimi foi ua suia faafuasei foliga. O le faamalosi lava a si toeaina, never, never, never give up. E anoanoa'i aoaoga na o matou maua, e pei o le galue, foi, faatino mea uma i le mea silisili e gata ai le lelei. Faafetai i le sao mo nai a matou fanau, i le aoaoina o le faitautusi, ma le faatauaina o nai a matou fanau. E le galo, e manatu pea. Faafetai, Faafetai tele lava mo mea lelei uma na e tautiga ai mo lenei tausaga. O la matou tatalo, ia alofagia e le Atua faamoemoega uma, ia faamanuia atu le Atua. Manuia Tele le Kirisimasi ma le Tausaga Fou.

2006

E ulufale mai lenei vasega i le 2003 ua iva tausaga talu ona avea le susuga ia Otele Perelini ma Pule o le Kolisi. Ui ina toaititi lenei vasega (16), ae sa iloa le fiafia o le susuga ia Otele i ai. E iloa lea tulaga i le toafa o aoao o lenei tausaga sa tofia i lona auaga. O le vasega foi lenei na gata ai le toe avea e Otele o lana mataupu masani o le 'Tusi a loane.' O le matou vaitaimi na suia ai le taimi e tuua ai aoga mai le 2:00 pm sa iai i le 4:00 pm e pei ona iai nei. O le naunautaiga o le susuga ia Otele ina ia lava tapena aoao mo a latou mea aoga. I le taimi nei ua toalua aoao o lenei vasega ua tausi nu'u, toafa ua avea ma faiaoga o le Kolisi Faafaifeau i Malua, toalua o loo i le ofisa Tutotonu, ao le toatele o loo fesoasoani i a latou lava ekalesia.

E momoli le faafetai tele ma le faamalo i le Susuga ia Otele ma Julie mo le tomai sa faasoa mai mo lenei vasega i soo se auala. O moomooga o lenei vasega atoa ina ia manuia tele le lumanai i nisi feau o le a fa'aaogaina ai o oulua soifua e le Atua.

2007

Fai mai upu o le pese masani: 'Ua faafetai, ua faafetai, ua malie mata e vaai....'

Mai le taele o matou agaga ma loto e momoli atu le faafetai tele i lau Susuga Prof. Otele Perelini, ma le faletua ia Julie, e tusa ma lo oulua sao taua i o matou ola aoaoina. E le tauilo tama a tausala aua e molimau a oulua galuega e tele. Mai le tausaga e 2004, na matou ulufale mai ai i le Kolisi Faafaifeau i Malua nei, seia oo ina faamanuiaina le taumafai i le 2007, se ua faamalo fai o le faiva. Ua aoaoina i matou e le gata i totonu o potu aoga i mataupu tau le Tusi Paia, a ua faapea foi i galuega ma mea fai a le Kolisi, ina ia o matou faia mea uma i le faamaoni ma le mea e gata ai le mafai. O lenei ua sulu lau foe ma tuta lou sa, a ua le magagana le tausaga e 2007 i se upu e nanea ai sa matou faafetai. Afai o iai ni manuia i lenei vasega, matou te ofo alofa atu ma faamanuia atu ai ia te oulua Otele ma Julie ma le fanau, aemaise laasaga fou o lo oulua soifua.

2008

Matou te molimauina foi le sao taua ma le aoga o le Susuga ia Otele ma le faletua ia Julie i o matou taimi ina ua matou ulufale mai i le Kolisi i le tausaga e 2005. Sa matauina le matautia a le taitaiga ale Susuga ia Otele i le Kolisi i soo se itu. O se Pule ese lenei le ma'ema'e i aoao ma faletua uma, pe a faaletonu se aga ma se amio i lana silasila. Ou te molimau atu o le tasi lenei tausaga (2008) e pito sili ona inaina i ai le susuga ia Otele, ona o le malosi o le tipi ma le fealoalofai i galuega a le Kolisi, e oo lava ia te au.

Peitai e ui i le tele o nei faafitauli, sa faaiiina lava ma le manuia lo matou taumafai i le tausaga e 2008. O nisi o lenei vasega ua faaogaina e fai ma faifeau tausi nuu, a o isi o loo galulue i le ofisa o le Ekalesia i Apia. Faafetai Otele ma Julie mo la oulua taitaiga i o matou ola taumafai. Tau ia ina ia o matou faaoga tatau lapataiga ma aoaoga sa tomatauina ai matou. Soifua.

mai le itulau 5

2009

O se vaai lautele a lenei vasega i le faagasologa o polokalame a le Kolisi i Malua i lalo o le taitaiga a Otele, e pei lava o loo faagasolo i faiga o se auaiga. E iloa lelei lava e le matai mea o loo fia faaleleia i lea aso ma lea aso. Na te vaai lelei foi poo faataunuu lelei le faiga o ia galuega ma aoga. Na te faafetaia foi aoao ma faletua poo faiaoga i mea ua faataunuuina lelei. Ae ote foi ia i latou e le o lelei ona faataunuu o latou tiute. I lona manatu poo le a lava se galuega ua tuuina atu ia te oe, ia faia ma le famaoni ma ia lelei. He speaks and leads by example.

Faafetai i le Atua ua matou maua le avanoa e iloa ai ma masani ai, aemaise le aotauina ai i lalo o le taitaiga faa-tama a le susuga ia Otele ma le faletua ia Julie. Ia manuia tele le malologa o le a feagai ai.

2010

Fa tausaga e le o se taimi puupuu pe a toe manatu i le tele o faafitauli ma luitau atoa ai ma le tau faamasani i itu ma aga faa-Malua, ina ua faatoa toai taunuu. Ae faafetai Otele ma Julie ona o lo oulua faapalepale ma le onosai i ni vaivaiga o lenei vasega. Ua tele ni mea aoga ua faaauppegaina ai i matou ona o lo oulua tamaoaiga faasoa mai, e le gata i le tino e ala i galuega, mafaufau i aoaoga ae sili ai le agaga e ala i amio faale-Atua ia tausua pea. Faamagalo ni sese o lenei vasega, ae ia alofa le Atua ia saga faamanuia pea ia te oulua ma le fanau i le lumanai. Ia manuia tele le alo atu i le Kerisimasi ma ia maua se tausaga fou fialia. E le galo Malua i le Agaga.

Vasega 2008-2011 (Vasega Faaiuso 2011)

I le suafa mamalu o Iesu Keriso le ao o le Ekalesia, matou te momoli atu ai le faafetai tele, i lau susuga i le Polofesa Otele ma le faletua ia Julie. I lo matou toai taunuu mai i lenei aai, sa oulua muai aumai upu e tomatauina ai lo matou ola taumafai. E le gata i le amio ia lelei, a o lo matou ola faaleagaga foi. Ua matou lagonaina lava le tele o lo oulua sao mo i matou, aemaise nai a matou fanau. Faamalo taupati, faafetai faapalepale i ni o matou sese, a o ni vaivaiga foi i aso o le tatou mafutaga. Ua lautele, ma ua oa foi o matou tagata faatauavaa i lou sosia faasoa mai i le Tusi Paia tainane le mataupu silisili.

E le galo lou alofa faatina Julie, ua masasau ai faitautusi a le fanau, ma ua lelei atiae foi le ola faaleaoaoga o le fanau i Kolisi ma lunivesite. O la matou tatalo, ia to mai i lagi manuia mo lau susuga Otele ma le faletua ma nai o oulua alo. Ia maua le soifua laulelei, ae sili ona atoatoa le mafaufau ma le agaga. Ia manuia le Kerisimasi ma le taussaga fou.

Vasega 2009-2012 (Vasega Lagolago 2011)

Lau susuga Otele ma le faletua ia Julie e le galo a oulua galuega lelei. O moomooga ia e faaleo ai se agaga faafetai i lau Susuga a le Polofesa Otele Perelini ma le faletua, e tusa ma la tatou mafutaga, ina ua ulua'i toai taunuu mai lenei vasega i le 2009. Matou te ulufale mai i le Kolisi i Malua, ua tau faaiuii le tautua a le susuga ia Otele ma Julie i le avea o i laua ma Faifeau, ma Pule o le Kolisi Faafaifeau. Matou te molimau, o Otele ma Julie o ni matua faaleagaga e faigata ona faagaloina, ona o uiga faitaugata ae tumu i le alofa. E le faagaloina lo oulua alolofa ma le tomai ua faasoa mai mo i matou. Faamanuia Le Atua i fuafuaga uma i le lumanai. Manuia le Kerisimasi ma le tausaga fou, Soifua ma ia manuia.

Vasega 2010-2013 (Tausaga Lua 2011)

E le galo Afia i si ona vao. O lagona o le faafetai i lau Susuga Otele ma le Faletua ona o lo oulua sao taua, o le a le galo. O le mua fetalaiga ia Ulumu ma Lefaoaseu, ua se togi le seuga na lagatila, ua faapulou i le tualima, ua malo fai o le faiva. Tele sou sao Otele e le faafaleleina e le gata o fanau a le Ekalesia ae sili ai le aotauina mo le feau a le Alii.

E ui ina puupuu le taimi o le tatou mafutaga, peitai e tele anoanoai mea taua ua matou maua mai lau susuga. E le faagaloina foi le sao taua o Julie e le gata i Faletua ae sili ai le aoaoina o a matou fanau. O le tatalo a lenei vasega ia alofa le Atua ma faaopoopo nisi aso se tele o lo oulua soifua tautua mo nisi galuega e tofia ai oulua. Faamanuia mo oulua ma le nofo a alo mai le tausaga muamua 2010. Ia manuia le Kerisimasi ma le tausaga fou.

Aoao e leai ni toalu (single students)

E lagona le loto faagae'etia ma le agaga faafetai i le Atua, ona o lenei tausaga ua faaiuina ma le manuia. O le aofai o le au uso mai le amataga o le tausaga e 33, peitai, e 24 Aoao ua totoe nei. E toalu na faaipoipo i le tausaga, ae toaiva na tuueseina mai le aoga ona o tulaga tau le amio.

E ui lava i ia tulaga faanoanoa na tulai mai, peitai sa tulaga lelei lava la matou mafutaga. E avea ai lenei avanoa taua e fai ai au ma sui o le mafutaga a Aoao e leai ni toalu, e momoli ai le agaga faafetai tele ma le faamalo i le Susuga i le Polofesa, Otele Perelini, ona o lona sao taua mo i matou, aemaise o le tele o suiga lelei na ia faataoto mo le au uso. E le gata i fale e nonofo ai, a o le tausiga i le tino. O lea ua matou 'ae'ae i au galuega lelei. Faafetai ona o le naunau ina ia siitia le Kolisi e ala i le faaleleia o le ola aotauina o alo ma fanau a le Ekalesia. Faamalo fai o le faiva. Ua matou molimauina le tele o lou sao e ala i galuega lelei uma ua faatinoaina, e le gata i le tele o tausaga ua mavae, ae faapea foi lenei tausaga atoa. Faafetai, faafetai tele lava....

Ia faamanuia le Atua i lau Susuga Otele ma le aiga, i so'o se galuega o le a faaogaina i ai le soifua i le lumanai. Ia maua se Kerisimasi fialia ma se Tausaga fou manuia.

Soifua,

Saolotoga Tausagafou.

AUFAIPESE A LE AULOTU I MALUA

O le aufaipese a le Aulotu i Malua, o le Taitaipese lava o le Susuga ia Otele Perelini. O lana lafoga masani lava, *"E le lelei tele la'u nota, ae ou te iloa lelei lava le pese e le'o sa'o."* O se taitai e tumau i ana faaiuga ma ona manatu. E le fialia Otele i pese fenifeni o loo taatele nei, ma soo se pese fou lava e fia aoina, ia pasi muamua e le Taitaipese fa'atoa fa'aaoga ai, ina ua pasia i lana faafofoga. Ua tele fati a a'oa'o mai o latou nu'u ua fa'asa e Otele ona toe faaogaina i totonu o le Fale lupeli. O le mea lea o lo'o tumau ai pea pese a le aulotu i Malua i fati tuai a le EFKS ma fati mai le tusi palagi o le *Congregational Praise*. O le au fuataimi foi o pese, e fuafua lelei e Otele a latou taga e fa'aaoga i le fuaina o nota.

O le Susuga ia Otele sa okaina le okeni taugata ma le anagata (Roland) o lo'o fa'aaogaina nei. O se okeni ua talafeagai lelei ma falesatele e pei o le Fale lupeli. E le soona ta ai foi se tagata faipese, na'o e ua pasia e Otele ua agavaa lelei mo lea taleni. O pese foi o le gasologa o le lotu, e fautuaina e Otele le au ta laau ina ia sauina lelei, ina ia maua le agaga tapua'i o le tagata, pe a ulufale atu i totonu o le falesa.

Faafetai tele Otele mo lou sao taua i le fa'atamauina o le mamalu ma le matagofie o pese i le Fale lupeli. O le a le galo lau Susuga, aemaise lava i taimi o le a usuina ai lau pese fa'apitoa o le Pese 222- *"Lau samala, lau samala e malepelepe ai."* Ia manuia tele le lumanai i i lau Susuga Otele Perelini, le faletua ia Julie ma nai o oulua alo.

Peniamina Leota, Faalepo Tuisuga, Eletise Suluvala

UA FAAMAVAE ATU LE KOLISI I MALUA IA OTELE MA JULIE

O le aso 19 o Novema 2010 i le itula e fitu i le afiafi sa faia aloaia ai se aiga fiafia a le Kolisi, e faamavae atu ai i le Susuga ia Otele ma Julie ma le aiga. O se po faigata e le gata i le Kolisi ae faapea foi le Susuga ia Otele ma Julie. E lei faigofie foi i le Susuga i le Alii Pule ia Afereti Uili ma le faletua ia Samata faapea le Sui Pule, Faiaoga ma faletua, ona fuafuaina lenei aso, aemaise o se taimi talafeagai mo lenei faamoemoe. E ui i lea, o le faamoemoe ua taunuu, o le laau lea o le soifua.

Na tatala aloaia lenei fiafia i se faiga lotu puupuu na saunia e le Susuga i le Alii Pule ia Afereti Uili, e momoli ai le agaga faafetai i le Atua, ona o le sao taua o Otele ma Julie, e le gata i le faitau fia selau o soifua na la aoaoina, ae faapea foi alo ma fanau laiti sa faafaileleina e le faletua ia Julie. O le Susuga i le Sui-Pule ia Maafala Lima, na fai ma fofoga o le po, ma o se po ese lea po, pe a fua i le tele po fiafia a le Kolisi o Malua. Na saunoa faafeiloai le Susuga ia Maafala ma ia taua ai le uiga o lea po, sei patipatia e le Kolisi le sao taua ma le galuega tele sa feagai ma le Susuga ia Otele ma Julie a o tutu i laua i le foe i tausaga e tele ua mavae. O le mea moni, e le tau faamatalaina a la galuega na fai, aua ua silafia uma e le toatele. O loo tulaga lelei foi le Kolisi Faafaifeau i soo se itu, ona o la laua taitaiga lelei ma le mae'ae'a.

Na tofu lava itutino uma o le mafutaga i Malua ma a latou meaalofo na ave mo Otele ma Julie, faatasi ai ma a latou fiafia ma siva. O nei itutino e aofia ai le Aoga Faataitai, Aoga Aso Sa, Autalavou laiti, o vasega taitasi i le mafutaga a Faletua ma Aoao, Au-aiga o le susuga ia Otele ma Julie, ae taualuga i le mafutaga a faletua

o Faiaoga. Na matauina le tele o pese na fatu ma lagiina faapitoa e aualofa ai vaega eseese o le Kolisi, mo Otele ma Julie.

Sa saunoa le Susuga ia Otele e fai ma sui o Julie ma o la alo, e faafetaia le agalelei a le Kolisi i Malua i ona itu tino uma. Na logomalie lana saunoaga ma e taliga e fia logo foi le Kolisi i lana saunoaga mulimuli faapea lana faamanuia mo le Susuga ia Afereti ma Samata ma le galuega o le a la feagai ai. Na o'oo'o foi lana saunoaga faafetai ma lana faamanuia i itutino uma o le Kolisi ma a latou tapenaga uma sa faia mo i laua ma le aiga, aemaise o laasaga o totoo o lenei tausaga.

Na talifuaitau le Susuga ia Afereti, e tusa o le saunoaga matagofie a le Susuga ia Otele. Na saunoa Afereti, e lei uma ai i lea aso le latou mafutaga ma le Susuga ia Otele ma Julie ae o le a toe faaaauai i le Aso Sa e sosoo ai, pe a aulia atu i le alofa o le Atua.

O le Aso Sa, aso 21 o Novema 2010, o le Aso Sa mulimuli foi lea o le Kolisi mo lenei tausaga, na tuuina atu ai le faaaloalo a le Alii Pule ma le Kolisi i le Susuga ia Otele na te taitaiina le Sauniga lotu taeao i le Fale Iupeli. O le auga o manatu o lea aso: "AVE UMA" ("SACRIFICE"). Ua talafeauga le feau na saunoa iai le susuga ia Otele ma le galuega faaiuii a le Kolisi o lenei tausaga aemaise le vasega faaiuasoo 2010. Na maea le sauniga, ona sosoo lea ma le toonai tele lava, na saunia faapitoa e faiaoga uma o le Kolisi i Malua, ma momoli aloaia ai sa latou meaalofo mo Otele ma Julie ma o la alo. O le Susuga ia Peniamina Leota na saunoa e faafeiloai aloaia le Susuga ia Otele ma Julie ma lo la alo o Olivia. Na sosoo ma le 'ava na fofogaina e le

Susuga ia Alesana Eteuati, a o le Susuga i le Sui-Pule Maafala Lima sa fai ma fofoga o lea aso. O se mafutaga matagofie lea aso, aua ua feuluuluta'i lagona o le alofa ma lagona faauso moni i le galuega ale Atua. O le maea ai o le taumafataga na tulai ai le Susuga ia Maafala, aua le faatamalii a le Susuga ia Otele ma Julie, aemaise o se meaalofo faatauua na saunia e faiaoga uma o le Kolisi.

Sa saunoa faafetai le Susuga ia Otele e fai ma sui o Julie ma lana fanau, ma ia taua ai, o se aso lea sa faigata tele ia te ia ona mafaufau iai. Peitai o lea ua oo mai lava aua o lea ua oo i siui o lana galuega i totonu o le Kolisi Faafaifeau i Malua. Na ia faafetai i faiaoga uma ona o le latou lagolagosua iai laua ma Julie ma le galuega. Na ia taua, e leai se mea la te mafaia pe ana leai le fesoasoani malosi a Susuga i faiaoga faapea a latou faletua. Na mulia'i ae le itiiti, na ia saunoa faafetai mo le meaalofo ua tauaoina faapea ona teuga uma, e ui la te lei mafaufauina. O ana upu mulimuli na saunoa faalaeiau ai i le aufaigaluega uma i faiaoga ma faletua ina ia latou lagolagosua ia Afereti ma Samata ma le galuega tauamata.

Na talifuaitau foi le Susuga ia Afereti Uili, e tusa o le saunoaga matagofie a le Susuga ia Otele, ma ia taua ai o loo fiafia lava le Kolisi e talisapaia i laua i soo se taimi, e asiasi mai ai i Malua nei. Na tuua e Otele ma Julie faapea le tamaitai o Olivia le Kolisi ma le faafetai tele, aemaise o faamanuiaga, mo le Kolisi ma ana galuega fai.

Tofa Otele ma Julie, Fiona, Emily ma Olivia!!!

Ia manuia tele le Kerisimasi ma le tausaga fou.

Ua fai meaalofo le Kolisi o Whitley mo e na aafia i le galulolo i le 2009, e ala mai i le Kolisi i Malua



Julie and Pele wrapping some books

O le tausaga e 2009 na foaiina mai ai e le kolisi a Whitley i Ausetalia se tupe e tusa ma le \$17000 SAT e fesoasoani ai i nisi o nuu na aafia i le galulolo i le tausaga ua mavae. O lenei meaalofo na tauala mai lava i le kolisi i Malua, ona o nisi o faiaoga Malua sa aoga i Whitley mo le faalauteleina o le taumafai. O le susuga ia Otele o le sa avea ma pule i lea taimi na saunia se tusi faafetai e tali aloaia ai ia Whitley ma faaali le agaga faafetai, e tusa o lea foai tele.

Ona o lea seleni na foaiina mai i se tasi o aoga Tusi Paia, ua manatu ai le susuga i le alii pule ia Otele ma faiaoga i Malua, o le a faaoga lenei seleni e

faatau ai ni tusi faitau mo fanau laiti mai le tausaga e 2 e oo atu i le 12 tausaga le matutua. Ua manatu foi le pule ma faiaoga, o le a faasoa lenei meaalofo tusi mo nuu e 4: Lalomanu, Vailoa Aleipata, Ulutogia ma Satitoo.

I le taimi nei, ua taunuu mai le tele o tusi sa okaina, a o loo faatali pea nisi o tusi e lei taunuu mai, ona faagasolo loa lea ona tufatufaina atu i nuu e pei ona taua i luga.

Momoli ai le faafetai tele I le susuga ia Otele mo lea faamoemoe aemaise le faletua ia Julie o loo nafa ma le okaina o nei tusi mo le fanau.

NISI O VAAIGA I LE SOIFUAGA O OTELE MA JULIE



Sili ma Malaea Perelini




Otele ma Perelini



Julie, Fiona, Otele, Aroma Saaga - Lotu Tamaiti MTC 1981



◀ Otele & Fiona



Otele & Fiona i fafo o
le Fale Iupeli ▶





Otele & Julie - on their wedding day



1994 - Luteru Vaifale, Otele, Isaia Tiatia, Tereise Vaifale, Eti Vaaelua - 150 tausaga



Otele ma Fosi



Olivia, Emily, Julie, Fiona, Otele



Otele, Misi Pouena, Misi Paratiso and his wife - 150 Tausaga



Otele Perelini



Popo Sua, Liki Tiatia, Situfu Tanielu, Ioritana Tanielu, Otele Perelini



Julie ma Otele



◀ Otele, Faamanuia i Malua



Peleti, Arthur, Otele, Norman - Malua 2006

MAFUTAGA AOA O & FALETUA

O se tausaga ese lenei i lagona o le mafutaga ona o le tuua e le Susuga i le Alii Pule, Polofesa Otele ma le faletua ia Julie o le Kolisi. Na faalogoina mai lava i le amataga o le tausaga tala i le uma o o laua taimi galulue ai i Malua nei, ae le'i mautinoa lelei se taimi. Ma e sa manatunatu lava iai le mafutaga, ma faapea loa ona fautuaina vasega taitasi ina ia nofo sauniuni i ai i lea taimi e faamavae ai ma i la'ua. Ua leva ona nofo sauni i ai le mafutaga, ama mai lava i le masini o Me i le taimi o le Fono Tele o le tausaga nei. Ma o sauniuniga mamao sa faia o le faatalatalanoa lea o laulau a fono a vasega taitasi i so latou lagona i ni meaalofoa pei ona sa tapena iai ma saunia i le aso o le faamavaega. Sa tuu lava i le loto malie o le vasega latou. Ae le gata i lea sa faapea fo'i ona amata tapena le mafutaga i le aoaoina o ni aitema (items) aua ni faafiafiaga (siva etc..) e faia i lea aso. E tele galuega lelei sa faia i le Kolisi i taimi o Otele ma Julie ua matauina e le mafutaga, ma e fai fo'i ma talanoa i ai i nisi taimi aemaise pe a maua le mafutaga i lagona o le misia o lenei auauna a le Atua ma le faletua, aemaise ai fo'i ua 15 tausaga talu ona pule ai i le Kolisi i Malua nei.

O Otele o se Pule e misia e le mafutaga aemaise o ona uiga naunau e fai ia lelei soo se mea e na te faatonuina e fai. O se Pule e finagalo loa mo se mea e atia'e o le Kolisi, faatino loa, e le tau faatali pe manatu fo'i e le faia ona o le a uma ona taimi ma le Kolisi. O le mea lea e vaaia ai lona inaina i nisi taimi ma vave ai le toatama'i ona o le naunau ia lelei se mea. E le gata i le itu i galuega faatino, a'o le tulaga fo'i i a'oga, ia lea lava e iloa le tulaga lelei pei ona i ai le siitia pea o le tulaga o aoaoga i le kolisi, pei ona faia ai nei le polokalame o tikeri, ma isi atiina'e faalea'oa'oga ua mae'a ona faatinoina.

Tau ia ina alofagia e le Atua Otele ma Julie ma le agai i luma o a la fuafuaga ma le aiga. Ia saga faamanuia pea le Atua. Ia faapea foi ona agalelei le Atua i le mafutaga a aoa o ma faletua i lea tausaga ma le agai i luma i le alofa o le Atua, i le mafuta ai ma le Susuga ia Afereti ma le faletua ia Samata, le ua avea nei ma Pule o le Kolisi. E faamanuia atu le Kerisimasi ma le Tausaga Fou mo Otele ma Julie, faapea foi mo Afereti ma Samata, faapea le Kolisi i Malua.

Soifua ona o Iesu.
Ioane Aloali'i (Peresetene 2010)

mai le itulau 3...Mafutaga Tina

Gagana au galuega se malo fai o le faiva

*Sou lagona fiafia ma se lagona o le faa-gaeetia
Tulaga faafaiaoga ua e siitia
Lou faaunauga matou te le toe fesiligia
O lea ua fua mai ma ua molimau lona manuia
CHORUS*

*Tatalo mai laia ma aumai sau faamanuia
Si au fanau nei ia galulue ma le fiafia
Pe valaau mai o ni nuu pe le taulia
"E sili lava Malua o si au lea filosofia"*

*A o se aga ua sese ma se tu le talafeagai
Ia e alofa natia ifo i fatu alavai
O oe o le tama e alofa ma loloto le vaai
E mu'a o le vao nei tau foi sau silasila mai*

*Le mavaega a Iakopo ma Lapana
Aumai Mesepa faatu i si o ta va
Aua nei faagaloina mai Ieruselema
O le aai sa osia ai le ta feagaiga*

*Ae sau ia sau loa o ole a ta faatofa
O alofaaga nei talitonu o alofa foi na
Oo i le afiafi sisi ane le faamalama
Ma tatou feiloai ai i luma o talosaga.*

MALUA KINDY

O le faafetai ma le viiga i le Atua e le faaititia lea ona o lona alofa ma lona agalelei i ai tatou, Ae muamua ona faatalofofa atu i le Suafa mamalu o lo tatou Alii o Iesu Keriso.

O sina ripoti puupuu lenei i le Kindy a Malua i lenei Kuata mulimuli o lenei tausaga 2010. O le aofai o tamaiti lenei Kuata e toa 20. E toa sefulu teine ae toa sefulu tama. E toalua teine ua tuua le kindy on ua atoa le tai lima o la tausaga, ma ua amata nei ile tulaga lua, ae toa lua teine faaopoopo ina ua atoa le tolu tausaga.

Faiaoga: O le Kindy o lo o i lalo o le faauluuluga a le faletua ia Julie Perelini, o le Faletua o le susuga i le Alii Pule o Malua, faapea le lagolagosua a le Faletua o le Faiaoga ia Lemapu Tuisuga. E toaiva fai'aoga, oi latou o Faletua o Alii aoao o le Kolisi Oi latou nei; Pauline Upu, Solonaima Paleono, Venice Issako, Vaitoa Teo, Tanaria Kolia, Paono Tofilau, Wynona Faasavlu, Aiga Crichton, Ana Autalaga.



Malua Kindy 2010

Ia momoli Lava le matou faafetai ile Susuga Professa Otele Perelini ma le Faletua Julie, aua i la lagolagosua i mea faatino i le Kindi.

Momoli lava le faafetai i le Faletua ia Julie ile Fatinoga tele o tamaoaiga o acitivites mo tamaiti. Aemaise lava le taimi e faaavanoaina i aso Toonai tai tasi e fesosoani mai i faiaoga i le faatinoina ai polokalame i aso taitasi mo le fanau. Faafetai foi i lenei Faletua i lona fesosoani malosi i le Kindi i ala lona foaiina tusi faitau ma

meataalo mo le fanau aemaise le aveina le fanau i Mcdonald i faiuga tausaga uma.

O le ripoti lenei, ae avea lenei avanoa e momoli faapitoa atu ai le matou faafetai i le Faletua o le Alii Pule ia Julie Perelini e tusa ai ma le faaaogaina oi matou e aoao le fanau iti. Faafetai mo auala esese i le aoaoina o le fanau ua matou faaaogaina i totonu o le Kindy e auala mai ai i le Faletua. E le faagaloina foi le

Susuga i le Alii Pule o le Kolisi ia Otele Perelini e ala i le foaina mai o le tapoleni aua le faapaoloina o le sandpit e taaalo ai le fanau. E le gata i lea ao seleni aua le faaleleia o meataalo ma tusi a le fanau, faapea mea ua faaleagaina o le Kindy.

Faafetai foi i matua ona o le latou lagolagosua i faiaoga ua iu ai lenei kuata i le manuia. O mealelei uma ua tatou faia, ia fai lea ma viiga o le tatou Tama oi le lagi

Soifua ma ia manuia
Pauline Upu

AOGA ASO SA

Vasega Amata: 50 e 24 tamaitai ae 26 alii. Vasega Laiti: 30 e 10 tamaitai ae 20 alii; Vasega Feololo: 17 e 7 tamaitai ae 10 alii; Vasega Matutua: 11 e 6 tamaitai ae 5 alii.

I lenei tausaga atoa i galuega faatino a le matou Aoga Aso Sa, o se faatinoga sa matua atoatoa ma lava tapena, le faatinoina o galuega faa-le-Faiaoga Aso Sa, ona o le fesoasoani malosi o le Susuga ia Otele ma Julie Perelini, o e sa avea ma o matou Taitai. Afai e silasila ma faafogofoga mai Otele, e le talafeagai se mataupu mo le manuia o fanau a Malua, e taumafai malosi lava mo se auala faigofie ma le lelei, ina ia maua ai se malamalamaaga mo le fanau. E pei foi ona faaalai i a matou tapenapenaga mo le Lotu Tamaiti, e le manao i se mea e faataga fai ma le lelei ona faatinoina. Aua foi e pele ia te ia fanau a Malua, lea foi e le manao ai e sasa e se faiaoga Aso Sa se tamaititi, ae e tataua ona aoai ma



Lotu Tamaiti Malua 2010

faatonu i upu ma tala. E le gata foi le la silasila i le itu faaleagaga o le tamaititi, ae e faatonuina foi i matou ina ia fai pea taaloga a le fanau i Aso Toonai, e le gata e faafiafiaina ai i latou, ae mo lo latou soifua maloloina lelei.

I le aotelega ia o le matou galuega faa-le-Aoga Aso Sa mo lenei tausaga,

ua manuia mea uma ma taunuu manuia mai ai i le faaiuga o lenei tausaga, ona o le taitaiga toafilemu a le Susuga ia Otele ma Julie Perelini.

O la laua taitaiga lelei ma mea lelei sa laua faia mo i matou, ae faapea foi alo ma fanau a Malua, ua le mafai ai ona matou faagaloina lenei Auauna alofa ma le agalelei a le Atua.

O la matou tatalo, ia faamanuia pea le Atua, i le Soifua galue i tiute ma

galuega o totoo, e le gata o le Ekalesia ae faapea foi le aiga. Ia maua pea lo oulua Soifua faafualoa, ma ia faatamoaigaina e le gata i le tino, ao le mafaufau ma le agaga. Manuia le Kerisimasi ma le Tausaga Fou.

Faafetai,
Falaniko Sio. (Faiautusi Aoga Aso Sa, 2010)

RIPOTI O TAALOGA - AOAO 2010

O le viiga, o le faamanu, ma le faanee-tagā e tumau i le Atua ina ua mafai ona faatauunu ma le manuia le polokalame taalō a le vasega o aoao i lenei tausaga faaleaoaoga. O se tasi lenei o polokalame taua i le kalena faaleaoaoga i le vasega o aoao, ma sa ave i ai le faamamafa a le Susuga i le alii Polofesa Otele Perelini, ao avea o ia ma pule o lenei Kolisi. O lona faatauaina o lenei polokalame ina ia maua e aoao le soifua maloloina lelei i le tino, faapea le mafaufau. O se tasi foi lea o auala e tuu itititia ai le atu o le mafaufau (mentally stress) mai aoaoga o loo feagai ai i lea aso ma lea aso.

I le iuga o taaloga o lenei tausaga (2010), ua avea ai le lanu uliuli (Black) ma siamupini i le tuufaatasiga o taaloga, e pei o le lakapi pai (touch) ma le soka (soccer). Ae i le taaloga o le kirikiti, ua siamupini ai nei le au Lanu Samasama (Tai Samasama) mo lenei tausaga.

I lo'u tulaga faakomiti o taaloga, e fai ai o au ma sui o Susuga i faaiuso (John Ah Honi, Isaako Sefo ma Ionatana Teo) o e sa galulue i le faatinoina o taaloga lenei tausaga, e momoli atu ai le agaga faafetai tele i lau Susuga i le Sui Pule poo le Taitai Komiti o Taaloga Maafala Lima FS, faapea le paia i le vasega o Susuga i

Faiaoga mo le lagolago mai i lenei polokalame. Matou te talitonu ua iu ma le manuia taaloga o lenei tausaga, ona o lo outou auai ma le faamaopopo mai i lenei polokalame taua. E momoli atu foi le faafetai i Aoao, ona o le taaalo faatausala ma le taaalo faatamalii, ua iu ai ma le manuia a tatou taaloga e leai se tasi o aafia ini manuaga tugā. E faapea foi ona momoli le faafetai tele i le Susuga Tunupopo Patu FS ona o le faatasi mai pea i Aso Tofi taitasi o taaloga.

E faapitoa se faafetai, i le Susuga ia Polofesa Otele Perelini i se tofa na a'e mo se polokalame faapenei mo Aoao, ae le gata i lea o Faiaoga. Ua faia lenei polokalame ina ia matou maua le soifua maloloina lelei i le tino, mafaufau faapea le agaga. Ua fai foi ma auala matou te mapu teisi ane ai mai i aoaoga o lo'o feagai ai i aso taitasi. O le mea mautinoa, e toatele lava le au-uso faatoa iloa mai i Malua kiki le polo soka, pe pasi se polo lakapi ma ta se polo kilikiti, ona o lenei polokalame. E faapea foi le toatele sa maua i mai o le tino ao lei ulufale mai i le Kolisi, ua matauina le tele o suiga ua iai, auā ua maua avanoa e faamalositino ai i taaloga. Faafetai, Faafetai tele lava mo le silasila mamao a lau Susuga mo le soifua

maloloina lelei o Aoao. O la matou tatalo, tau ina ia faamanuia le Atua i lau Susuga Otele ma le faletua ia Julie. Ia maua lo oulūa malosi i le tino, mafaufau ma le agaga e faauuina ai la oulūa auaunaga i le Atua ma lona finagalo paia, i soo se ala i tofiga a lana Ekalesia.

Faapea foi ona faamanuia le Atua i le Alii Pule, Susuga Dr Afereti Uili FS ma le faletua ia Samata ma le fanau ma le feagai ai ma le taitaiina o le Kolisi Faafaifeau. Faamanuia foi le Atua i Susuga i Faiaoga ma o latou faletua ma fanau, ma le feagai ai i tiute ma faiva ua valaauina i ai lo outou soifua. Faamanuia foi i le vasega o Aoao, o i latou o le a toe foi mai e faauu le tau-mafai i lona tausaga fou (2011). Faapea le Vasega Faaiuso o le 2010, ia manuia o outou faamoemoea uma mo le agai atu i le lumanai. Manuia le aga atu mo le taufaaiiuiina o feau ma galuega o lenei tausaga.

"IA MANUIA TELE LE KERISIMASI MA LE TAUSAGA FOU I LO TATOU NUU - HAVE A VERY MERRY X-MAS AND A PROSPEROUS NEW YEAR TO YOU ALL"

A TRIBUTE TO PROFESSOR OTELE PERELINI



**Pule o le Kolisi
Leulumoea Fou, Fauolo Ape Vai**

"A beautiful life does not just happen, It is built daily by prayer, humility, sacrifice and love. That beautiful life is yours"

Dennis Castillo

Otele and Julie, we extend our sincere thanks and appreciation for all your good teachings and pastoral leadership in the past years. We are forever grateful for the warm fellowship and fatherly love you shared with past and present teachers and

students of Leulumoea Fou. May Our Heavenly Father continue to shine His love and kindness on you and the girls as you continue to serve Him. Our fondest regards and prayers for you always.

Ua api le uli

Ua sina le galu

O au galuega ua ou teu fatu.

Ua se togī ai nei le seu na lagatila

Ua faapulou i le tualima

Faamalo fai o le faiva!

Avea ia lenei avanoa ua tuuina mai e le Komiti Faafoe o le Maluapapa, matou te momoli atu ai le faafetai ma le faamalo i lau Susuga Otele Perelini ma le faletua, o le Faifeau o le Aulotu a le Tafatolu i Malua, ona o la oulūa taitaiga faatama i tagata lolotu i le Fale Iupeli i tausaga e tele. Matou te talitonu ma le mautinoa, ua susu uu le tele o feoi o le Tala Lelei o e na lua faafailele i tomai ma sosia, e le gata i le faaletino ae faapea foi i le galuega a le Atua. O lou alofa faasoa

ua le gata mo le aotauina o Lupe-faalele a le Ekalesia mo le galuega faafaifeau, a ua oo mai lava au faamanuiaga i tama nofotumau ma faiaoga o le kolisi i Leulumoea Fou.

Faamagalo se sese o le Pulouapa i la tatou mafutaga, i sa matou tautua ua le atoa ma se auaunaga ua faatamala. O oe lava o le matua faitama, e galo ai so matou leaga, aua e poto lava le tautai ae se lana atu i ama.

O la matou tatalo fai pea i le Atua pule pule tetele; la faamamalu Ona aao agalelei e puipui ma tausi ia te oulūa ma le fanau. Ia faaaogaina pea e lo tatou Matai lo oulūa soifua e tautua ai pea i soo se auala e tusa ma Lona finagalo. O le a le galo oulūa i o matou loto ma agaga.

Manuia le Kerisimasi ma le Tausaga fou!!!

Pule, faiaoga, tama ma teine o Roma Fou.

AUTALAVOU LAITI

E viia pea le alofa ma le agalelei o lo tatou Tama o i le lagi ona o lana pule faasoifua, ua ia ta'itai'ina ai lo outou soi-fua ma so matou ola. E ui lava ina umi la tatou malaga i lenei tausaga, ae talitonu le manatu, o lo'o faamalumu mai pea aao agalelei o lo tatou Alii i ai tatou.

Ae faapito augafa ia se manatu o lenei ripoti i le Susuga ia Otele ma le faletua ia Julie, o le faatama ma le faatina o le Malua Junior Youth. E momoli atu le faafetai ia e tusa ai ma le lua taitaiga faa-matua. E ui lava ina ua tuuina mai e Otele le faatuatuga i faiaoga, faletua o faiaoga, aoao ma le faletua mo le tautauga ma faagasologa o le polokalame, ae ua le ave lea ma ala e faatafa ai le faasoa mai o lau Susuga. Faafetai mo le tele o tamaoiga sasaa mai ua fa'aaupaina



Malua Junior Youth 2010

ai i matou i le vaaiga o lea vaega taua o le Tafatolu, ao le faamoemoe o le tatou fefa'asoa'i, ina ia faafaileleina ma tapenaina o tatou fanau mo se lumanai manuia. Atonu o le lesone taua lava lea ua matou maua mai oulue, aua e pele

ia oulue tamaiti Malua. E le misi lava i tausaga uma le asi-asi mai o tatou paaga, o le South Seas Christian Ministry i Malua. Aisea? Aua e faamua-mua i le manatu o Otele ma Julie o tatou fanau. Amuia lava tamaiti Malua i le tele o faamanuiaga mai matua e moni le la alofa. Matauina foi le mafanafana o le mafutaga a fanau i le Junior Youth, o se mafutaga e feuluuluta'i i le alofa. Atonu o se faailoga lea o lua taitaiga. Faafetai, faafetai lava. E le faaititia pea le agaga faafetai ia Fiona, Emily ma Olivia ma le latou sao i lenei

mafutaga...you are indeed true role models! O le a misia outou.

Alofaaga,
Malua Junior Youth

VAEGA O LE PAPOVI

Maua luga pea le viiga o le Atua ona o lana taitaiga i lo tatou ola, ua mafai ai ona faaiuina lenei tausaga i le manuia. Aemaise o lenei vaega o loo gafa ma le vaaia o le atinae manu papalagi a le Kolisi, o se tasi o atinae sa fesoasoani tele i mea fai a le kolisi aemaise o ana taligamalo. E aualofa ai i o matou matua o Otele ma Julie e tusa o le filifilia oi matou e nafa ma lenei atinae taua a le kolisi. Tele mea lelei sa mafai ona faatinoina i le papovi. E pei o le toe faaleleia lea o le sikokia mo le faafaigofie o galuega faafomai manu, aemaise foi pe a faaiina ni manu, ina ia tumau pea lona mama i taimi uma. E le gata i lea sa mafai foi ona aumaia nisi o taaiga uaea fou mo le toe faaleleia o vaega o le pa ua pala. Mea faigaluega fou mo galuega a lenei vaega, faatasi ai ma le uaea sipaka mo le faaogaina lea e fesuia'i ai manu i nisi o vaega le tumau. Maua faamatalaga sa tele le aoga o lenei atinae i mea fai a le kolisi talu ona tulai mai le Susuga ia Otele. O ia vaega uma sa mafai ona faatinoina ona o le talisapaia e le tama ia Otele sa tu i le foe i lea vaiata. Faafetai i taimaiga faatama sa tuuina mai e manatua pea i le agaga.

O le aofai o le lafu o loo i ai i le taimi nei e 18, (2 pulu, 3 steer, 7

aumatua, 4 taanoa, 2 tama'i povi). O loo matauina le toe siitia o le aofai o le lafu e ala lea i le faaopopo pea o le fananau mai o manu. Sa amata ona faaititia le lafu ona o fautuaga tuuina mai le ofisa o faatoaga i le lava lea o le tulaga o le vao. Peitai o le taimi nei ua talafeauga tonu ma le toe faaopopo o le fuainumera.

O galuega faatino a lenei vaega e aofia ai le vaaia lelei o manu poo atoa i aso taitasi, e ala lea i le siaki i le sikokia ma faafeinu, aemaise o le fesuia'i mai lea poloka i lea poloka, i le aofai e 10 poloka, faaleleia o le pa, siakiina poo soifua maloloina lelei, afai e manaomia se galuega faafomai manu, ona logo lea o le ofisa o le fomai manu i Avele mo se fesoasoani. E masani foi ona fesoasoani ai le nuu e ala i se faaafu a aoao i se taeao ma maua ai le malosi fou, aemaise o le tulaga i le mautofu, vao pinati ma le vaofefe palagi.

Momoli le faamalo i le susuga i le faiaoga ia Vaitusi Nofoaiga e tusa ai o le taitaiina o lenei vaega. Faafetai mo mea lelei uma, o fautuaga lelei sa tuuina mai. Tele o taimi tatou te galulue faatasi ai ma faaleleia ona o lou manatu i le atinae a le kolisi ina ia aua nei faaletonu. Momoli foi le faamalo i aoao sa tatou galulue i

lenei tausaga, faaiuso ia Momoe Gagaeolo ma Semikueva Malala, aemaise o aoao ia Siatafu Tinai, Tanoaleia Tunupopo, Pakini Waterhouse ma Luteru Ogeuta. Faamalo foi i lagolago ia Tanuri Pesaleli ma Kamuta Mataafa e tusa o lua tiute, sa lua le faafiti i le tele o taimi, malo le onosai. Sagai maia ai o le tai, ia manuia tele lo lua alo atu mo le taitaiina o le tatou vaega i lenei tausaga, aemaise o le auuso. Maua le lototele ma le malosi e faatino ai ana feau.

Faafetai faapitoa i le susuga i le Alii pule ia Afereti Uili e tusa ai o le tatou mafutaga e ui e lei umi, ae talitonu ua silafia e le Atua lo matou agaga fiafia. Talosia ia le alofaiva o oulue matua i le galuega fou, maua le malosi e faatino ai ana feau. Faamanuia le Atua i lau susuga Vaitusi ma le faletua ma le nofoaalo, e tusa ai ma le toe faaauauina o le taumafai. Maua foi e a outou Susuga i aoao se tuuaga fiafia. Manuia tele le Kerisimasi ma le tausaga fou i lau Susuga i le Alii Pule ma faiaoga ma lo tatou nuu atoa aemaise o nai fanau, ae faasilisili ai le tama ia Otele ma Julie. Moomooga alofa pea mo oulue e le mavae.

Soifua
Fililagi Toleafoa

LAUGATO GI A L E K O L I S I - 2010

Sa faatumulia le Maota o le Mafutaga a Tina, i matua, aiga ma uō mamae a le Kolisi ma le vasega Faaiuasoo 2010, aua le tauaaoina o faailoga mo i latou ua faamanuiaina i lenei tausaga i mataupu sa aoaoina ai. Sa matagofie atili lea fiafia i le afiio mai o Tama o le Ekalesia ma o latou faletua e molimauina lea faamoemoe, faatasi ai foi ma le Susuga ia Otele Pere-lini ma lona faletua ia Julie.

Sa saunoa faafeiloai le Fofoga o le po, le Susuga ia Maafala Limā, auā le paia mauuluga i le afio o le Taitaifono o le Komiti a Malua, le paia i Tama Faatonu ma o latou faletua, Susuga i Toeaiina ma o latou faletua, Susuga i Faafeagaiga ma o latou faletua, le paia i aiga ma uo a lenei Kolisi, le vasega Faaiuasoo 2010 ma le Kolisi atoa.

Ina ua maea le taumafataga, sa tauaaoina loa faailoga mo Aoa ma Faletua sa faamanuiaina le taumafai i lenei tausaga i mataupu eseese, mai le tausaga muamua se ia o'o i le vasega faaiuasoo. O i latou la nei sa faamanuiaina i faailoga:

Tausaga Muamua		Tausaga Lua		
Mataupu	Aoao	Gagana Eperu (Hebrew)		Brian Kolia
Faatomuaga i le Feagaiga Tuai	Filemoni Tuigamala	Suesuega i le Feagaiga Tuai	(Degree)	Seumaninoa Puaina
Faatomuaga i le Feagaiga Fou	Filemoni Tuigamala		(Diploma)	Palau Sinapati
Tala Faasolopito o le Ekalesia	Filemoni Tuigamala	Toefuataina (Reformation)	(Deg)	Seumaninoa Puaina
Mataupu Silisili	Karanita Petaia		(Dip)	Palau Sinapati
Fausaga o Lauga (Homiletics)	Filemoni Tuigamala	Mataupu Silisili	(Deg)	Seumaninoa Puaina
Gagana Eleni (Greek)	Isamaeli Aulai		(Dip)	Palau Sinapati
Gagana Eperu (Hebrew)	Karanita Petaia	Suesuega i le Feagaiga Fou	(Deg)	Seumaninoa Puaina /
Metotia mo le Faauigaina o le Tusi Paia				Brian Kolia
(Biblical Criticism)	Enoka Aperamo		(Dip)	Palau Sinapati
		Gagana Eleni (Greek)		Seumaninoa Puaina
		Aoga Lauga Iupeli		Sili Moa
		Galuega Faa-Kerisiano (Christian Ministry)		Seumaninoa Puaina

Tausaga Tolu		Tausaga Fa	
Talitonuga Faa-Kerisiano i le Pasefika	(Deg) Faafetai Aiava	Lauga Iupeli (Sermon)	Ioane Aloalii
	(Dip) Aperamo Tufuga	Tapuaiga Faa-Kerisiano (Christian Worship)	Viliamu Chang Foug
Galuega Faamasani (Field Work)	Reupena Maulolo	Suesuega i le Feagaiga Tuai	Viliamu Chang Foug
Mataupu Silisili	(Deg) Faafetai Aiava	Suesuega i le Feagaiga Fou	(Deg) Isaako Sefo
	(Dip) Aperamo Tufuga		(Dip) John Ah Honi
Suesuega i le Feagaiga Tuai	Faafetai Aiava	Mataupu Silisili FaaPasefika (Pacific Theology)	Fililagi Toleafoa
Suesuega i Mataupu Amulī (Eschatology)	Semikueva Faatoafe	Tala Faasolopito Ekalesia i le Pasefika	(Deg) Ioane Aloalii /
Suesuega i le Feagaiga Fou	(Deg) Faafetai Aiava		Fililagi Toleafoa
	(Dip) Kamuta Mataafa	Amio Tausaafia (Best All Round Student)	Eric Mulitalo
Suesuega Faa-Ekalesia Soofaatasi	(Deg) Faafetai Aiava	Taumafai Alualu i luma (Most Improved)	Falaniko Sio
	(Dip) Malotau Lafolafoga	Mataupu Silisili	Richard Noaese
		Mataupu Silisili Faa-Lotoifale (Contextual Theology)	Fililagi Toleafoa
		Galuega Faa-Kerisiano i totonu o Sosaiete Fesuisuia'i	Isaako Sefo
		Aoaoga Taua o le Feagaiga Fou (NT Themes)	Viliamu Chang Foug
		Mataupu Silisili o le Feagaiga Tuai	(Deg) Ioane Aloalii
			(Dip) Iakopo Faasalaina
		Talaaga o Tupu – F/Tuai	Viliamu Chang Foug
		Suesuega Tusitusia (College Thesis)	Ioane Aloalii /
			Maligi Setefano

Faailoga Togia (Merit Prizes)		Faailoga Togia (Academic Achievement) – Faletua	
Tausaga Muamua	Filemoni Tuigamala / Karanita Petaia	Tausaga Muamua	Elena Petaia / Maria Tiatia
Tausaga Lua	Seumaninoa Puaina	Tausaga Lua	Miriama Mata'i
Tausaga Tolu	Faafetai Aiava	Tausaga Tolu	Fuarosa Maulolo /
Tausaga Fa	Viliamu Chang Foug		Litia Polutea
		Tausaga Fa	Mae'e Faresa
		Faailoga Faapitoa - Faletua	
		Faletua Sili i le Amio Lelei	Faataualofa Meaalofa

E faamauina pea le agaga faafetai o le Kolisi i a'i latou uma lava o loo ofoina mai pea faailoga mo lenei faamoemoe i tausaga taitasi. Ia faamanuia le Atua i lo outou soifua tautua ma le fesoasoani i le Kolisi.

O le Susuga ia Auelua Samuelu Enari sa fai ma sui o le au valaaulia e faafetaia le Kolisi mo lenei faamoemoe, ona faaiuina lea e le Taitaifono o le Komiti a Malua, le Susuga ia Ioritana Tanielu (FT) i le tatalo faamanuia.

IA MOTU LE PA A UA ILOA...

Avanoa Sikolasipi mo Faiaoga

E toatolu Susuga i Faiaoga Malua ua sauni nei mo le toe faalauteleina o le tomai ma le silafia i le faailoga o le Tofa Manino (Doctorate of Philosophy) i atunuu i fao i le tausaga 2011, e pei ona faamaonia mai e le Komiti Faafoe a Malua. O le Susuga ia Arthur Wulf faapea foi ma Vaitusi Nofoaiga o le a a'otauina i le Iunivesite o Aukilani (Auckland University) i mataupu tau Tusi Paia, i le Feagaiga Tuai ma le Feagaiga Fou. O le Susuga ia Latu Latai o le a faaauauaina le taumafai i le Iunivesite o Ausetalia (Australia National University) i le mataupu o le Tala Faasolopito o le Ekalesia.

Ua tapena nei le au uso ma o latou faletua ma aiga mo lea faamoemoe taua. Ia faamanuia le Atua i le taumafai.

Fonotaga i Malua – Primal Religion Consultation

Sa faataunuuina mai i Malua se fonotaga ua taua o le “Primal Religion Consultation” mai le Aso 14 Iulai, se ia oo i le Aso 26 o lea lava masina. O lenei fonotaga o se faatalatalanoaga e faatatau i le taua o tu ma aga ma tapuaiga mai anamua a atunuu eseese, a o lei taliaina e tagata isi talitonuga e pei o le talitonuga Faa-Kerisiano. Sa auai i lenei fonotaga sui mai Ghana, Nigeria, Aferika i Saute, Filipino, Bolivia, Amerika, Peretania ma Samoa nei.

Sa maua foi le avanoa e molimauina ai e i latou sa auai mai nisi o tu ma aga Faa-Samoa, e pei o le Ava Faafeiloai, o le agaga talimalo o si o tatou atunuu faapea foi le auai atu i nisi o Aulotu mo tapuaiga i Aso Sa. Sa maua foi le avanoa e malaga atu ai i Savaii.

O le Susuga i le Sui Taitaifono o le Fonotele, le Susuga ia Lale Ieremia (FT) sa taitaia le sauniga amata e tatala aloaia ai lenei fonotaga. O le tasi o taitai o lenei fonotaga, le tamaitai ia Dr. Mary Bediako mai Peretania sa faaleoina le agaga faafetai o le au malaga i le Ekalesia Aoao ma le Kolisi, i le taliaina lelei o lenei fonotaga.

South Seas Ministry

Sa faataunuuina foi i lenei tausaga le faiga paaga masani a Malua ma le au malaga mai le South Seas Ministry mai Amerika. O lenei faamoemoe e agai i le tupulaga o le Kolisi, a e sa maua foi avanoa taua mo le au faigaluega ma Aoao e fetufatufaa'i ai ma le au malaga. O le vaiaso atoa sa mafuta mai ai lenei au malaga.

Sa faatino foi e le Kolisi ana āga masani o le aiga faa-le-aiga ma meaalofo ma le au malaga, a o lei tuua le mafutaga. Sa faapea foi ona foai mai e i latou meaalofo mo le fanau ma tupulaga talavou o le Kolisi. Malo faafetai le faasoa mai, auā le lumanai manuia o alo ma fanau o lenei Kolisi.

Alesana Palaamo i Fonotaga i Ausetalia

O le masina o Iuni sa malaga atu ai le Susuga i le Faiaoga ia Alesana Palaamo mo se fonotaga i Ausetalia a le Asosi o le Mataupu Silisili Faatino a le Pasefika (Association Practical Theologians Oceania - APTO). O le aso 20 – 22 Iuni 2010, na faatinoina ai lea fonotaga i le Australian Catholic University (ACU) i Brisbane, Ausetalia.

O le manatu autu i lea fetufaaiga – **“Dreaming a New Earth: Indigenous Spiritualities and the Vision of Raimon Panikkar.”** Na saunia e Alesana se pepa ua faaulutalaina: **“From Tradition to God: A Qualitative Study Towards Redeveloping the Spirituality of Samoan Youth.”** O se suesuega i le taumafai e faaolaola le ola faatuatua ma le ola tapuai o tupulaga Samoa o le Ekalesia Faapotopotoga Kerisiano Samoa i Samoa nei ma atunuu i fafo.

Fonotaga a le Oceania Biblical Studies Assoc (OBBSA) ma le Waves of the Moana.

O le Susuga ia Otele Perelini, Vaitusi Nofoaiga ma Eletise Suluvale sa auai atu i lea fonotaga sa faataunuuina i Aukilani, Niu Sila i le aso 9-10 o Iulai, 2010. O le sini autu o lea fonotaga: “O le Vaai Faa-Tusi Paia ma le Faa-Mataupu Silisili i le Suiga o le Tau i le Pasefika.”

O se taumafaiga vaavaalua a le ‘OBBSA’ ma le ‘Waves of the Moana’ o le Pasefika e fefaasoa'i ai Faa-Tusi Paia ma le Faa-Mataupu Silisili, i se tasi o mataupu ogaoga o loo aafia ai le atu Pasefika, ‘o le suiga o le tau’.

Talosia ia e maua pea avanoa faapenei mo le au faigaluega, aua le faalauteleina o le silafia, mo le a'otauina o alo na fanau a le Ekalesia.

Avanoa Sikolasipi i Fiti

Ua filifilia nei e le Susuga i le Alii Pule ia Rev. Dr. Afereti Uili ma le aiga faiaoga le Susuga i le Aoao ia Viliamu Chang Founu mo le avanoa sikolasipi i le Kolisi Faa-Faifeau a le Pasefika i Fiti. O le Susuga ia Viliamu ua faauluulu iai le vasega Faaiuas o lenei tausaga 2010, ma ua filifilia o ia mo le faamoemoe o le faalauteleina o le silafia mo le galuega faa-faiaoga i le lumanai (*staff development*).

Ua tapena nei le Susuga ia Viliamu ma le faletua ia Catherine ma le fanau mo lea faamoemoe i le tausaga fou 2011. Ia faamanuia le Atua i le taumafai. Bula vinaka!

Avanoa Faa-Misionare i Atunuu i Fafo

E toalua Aoao Faaiuas o lenei tausaga 2010, ua sauni atu nei mo le galuega faa-misionare i atunuu i fafo mo le tausaga fou. O le Susuga ia Peni Meaalofo ma le faletua ia Faataualofo, ua filifilia mo le galuega faa-misionare i Jamaica poo Guyana mo le lua tausaga. O le Susuga ia Risati Noaese ma le faletua ia Imoa o loo tapena foi e galulue i Jamaica mo le lua tausaga.

Ia faamanuia le Atua i lea laasaga o le soifua ofoina atu mo la ma Lana galuega. Tatou toe feiloai i le manuia ma le filemu o le tatou Tama o i le lagi.

FAAMALO FAI O LE FAIVA



Emily, Otele, Olivia, Julie, Fiona

*“Ia silasila mai le Alii
ia te i taua,
pe a ta te'a eseese
o oe ma a'u”*

[Kenese 31:49]

Komiti o le Maluapapa

Peniamina Leota, Alesana Eteuati, Latu Latai, Saipele Maiava, Terry Pouono, Visesio Saga, Aigofie Marino, Samasoni Alama,
Leituala Malieitulua, Imoa Setefano, Malutafa Leaupepe, Alesana Pala'amo

Kolisi Faafaifeau i Malua

www.malua.edu.ws

© 2010